



KBCI Thuso

Regd.No.19134/88
<http://www.kbc.org.in>
 NAI/220/99
 No-G-4/Regd.Magazine
 /KBCThuso/MNP-81

Kum 57 Ihinna

Tolbol/January 2021

KUMTHAH 2021

Lemna Chibai

Machalna Tohgon

FEBRUARY EVENTS

MBC Day of Prayer - 07

MTC Day - 28

"Kapa theng, eini pumkhat ihi bang a amaho jong
 pumkhat ahitheina ding un, Nangman amahohi hong in"

John. 17:11



10 Dec. 2020 : ABAFARM leh KBC in kinoptona MOU sign ana bol ta



KBC Central Choir Member thah kilah be ho thenso na kin Elijah Prayer Mountai mun a lhandohna ana umta



KBC Events dungjui a Convention Audit ana chelha in Damsel in jo in ana um tan ahi.

CONTENTS

THUMAKAI HO

KIGUONTOHNA PHAT /Editorial	2
PILHINNA DING MASUON UTE/Rev. Dr. M. Thongsei Haokip	4
PAKAI TO KILHON KHOM/Pastor Seikhogin Haokip	9
Themjil hole Service bolho dia poimo/Rev. Lunkhosei	12
LOLHINNA DING KALBI HO/Tingneilhing Kipgen	14
Men Column	17
Women Column	20
Development Column	21
STS Column	23
Office Diary	24

EDITORIAL BOARD

Chairman	: Rev. Tonglet Haokip, President KBC
Editor	: Dr. M. Thongkhosei Haokip, General Secretary
Joint Editor	: Rev. Onkho Haokip
Contributing Editors	: 1. Rev. Thongkhonlun Touthang 2. Rev. Lamkeng Lhouvum 3. Rev. Tongmang Haokip 4. Pi Lhingbem Haokip 5. Rev. Lunkhosei Tuboi 6. Rev. T. Thangkhosei Haokip
Design & Layout – Pu S. Lenboi Haokip	
Circular Manager – Pi Vahboi Baite	
Recorder – Ms. Nemhoichong Haokip	

THUSO LAHMAN

Church/Organisation/ DepartmentRs. 300/-
Individual Rs. 200/- (Post a Rs. 250/-)

Indian Overseas Bank, Imphal Branch
A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 70895979446 Contact thei.
Circulation to kisai lam Mobile No. 9862107393 bol ding.

Editorial...



KIGUONTOHNA PHAT

Editorial

"Mi koi hileh theichang phung kiphun Atheiga ane tei jin, Chuleh koi hileh apupa vengtup thema jong Min ajabol teiyin ahi. Prov.27:18. "Nangho duha'n lhahih un; Pathen chu nelpheh dan ahipoi; ajeh iham iti le mihemin aman atutu chu aat ding ahi." Gal.6:7.

Amasatah in muntina um Kuki Christian chate jouse ahideh a KBC member ho jouse chung a i Pakaiyu Jesu Christa minin Kumthah salaam kahinpe cheh uve. Tulha thupi chu "Kiguontohna Phat" kiti ahitoh kilhonin, hiche thudol ah chomcha ana ki-houlim u hite.

Ningkum lhung keiyin Coronavirus @ Covid-19 in eina toupha jallun koima ideibanga chat thei beh louvin eilhauvin, leiset natoh hihen van lam natoh hijong le asuboi lhez jenge. Lhumlam gam phabep a lockdown aum kattan ahileh eiho gam jong chutobanga hung umkit ding ham ti lunggimna khat chu anahiye. Ahin, vangphat tiding ham ahilou le Covid natna jenna ding loule-ai ahung kisemdoh tah jeh hamin chuto-

banga lock down ding ima agin kit tah louhi thilpha hinte tia lah ding himaiyinte.

Kumthah ahung hi toh kilhonna kiguontohna phat hung hikitji ahitai. Chunga kisun Bible in kiguontohna akhoh je dan eihilun ahi. Kumbul ahitoh kilhonin, achesa a Pathenin eima pui jaluva Ama thangvahna ana peu hite. Tukuma dingin ihinkhou Pathenin athah a eiman cheh theina dingun thengselin kipehdohna ananeyu hite. Pathenin nang leh kei changvalin, i-insung, ihoubung mangcha'n ichenkhompiu mihem te leh ganhing, thingna-songna phatthei aboh nome.

Hichena dingin changval le lhangpi nuna lunglut tah le kitah tah a iki ngensena ho suh bulhit ding hi ahi. Chunga Bible chang teni hin aseilhon chu, mihon atohna mun angailut uva janei tah a abola ahileh ama jong jana le phatchomna achang teiye tihi Christian jousen hetcheh keo hilouva ana tong hon bolchek dinghi thilpha hinte.

Kiguontohna hi Christian te chondan phatah khat chu ahi. Hiche kiguontohna ding lah a itohna a lunglut pina le ngailut na hi apoimo pen loikhat ahi. Chutobanga mite a dinga phatthei channa dinga ikiguontoh thei tengu leh Pathen jong kipah in tin, eimahokah a kingailutna leh kipumkhatna pungin te. Lunglut tah a sim jouse chungu Pathen vangpeh chang taken.

PILHINNA DING MASUON UTE

PILHINNA DING KALBIHO

Rev. Dr. M. Thongkhosei Haokip

ARTICLE

Ahin i-Pakaiyu le Huhhinga Jesu Christa milungset le hetna a khangtou jingun tu le tonsot geiyin loupina Ama a um hen. Amen. II Peter 3:18

THUMAKAI

Kuki Baptist Convention in ningkuma pat tukum 2021 thupi dingin "Pilhinna dingin masuon ute" (Heb.6:1) kiti thupi ichejomp diuvin ahung kiguong tan ahi. Hiche toh kilhonna Pilhinna thudol sermon/article khat hi KBC Thuso amasa pen issue a itahdoh nomun ahi. Ningkum January issue chun Pilhinna Melchihnaho (Marks of Maturity) ah ina kihoulimun, tukum a dingin, "Pilhinna ding Kalbiho" (Steps to Maturity) tia ana kihoulimu hite.

Pilhinna hetbe theina dingin chapang naosen khat a tekahna khat veu hite. Chapang naosen chu tahsa lam hihen lungthim lam chule lhagao lam hijong le pilhing lou ahi. Hijeh a chu chapang naosen chun ama chama aumna akilhep thenga, alupna akisem, ahilouleh invel suhtenga anhonna pang ding kiti chu koiman hiche chapang naosen a kona chu kineppina le ngai-chatna kinei loubek khat chu ahi. Chapang naosen chun achama lekha ahin kisima, angka (maths) ahin kikhoh theiya, subject dang dang jong ama chama ahin kisim ding jong ginchat umlou ahi. Hiche chapang naosen chu pilh-

ing loulai ahijeh a chu anpeh, siltheng, vonpeh, ijakai joh ibolpeh u ahi.

Ahin, chapang naosen chu ahung let jep jep le akhantou ding le apilhin ding kikineppi ahi. Aop a toile le a kona akenga adina avale ding, hetthei lou chapang pao/haam a kona thucheng kicheh ahin seidoh ding, bongnoi/changnoiya kona buham ahin neh ding, ima jouse bolpeh louva ama achama akibol thei tah ding tiho hi kikineppi ahitai.

Tahsa lama hitobanga kineppina akinei bang chet a chu lhagao lama jong ahung hi ding kikinep-

pia ahi. Christa ikisan pet a chu penthahna ineiyuva, lhagaova chapang kihi ahin, pilhing lou akihie. Bible thudol le houbung thudol ahilouva ahileh alhangpia Christian hinkho hin ding danho ima kihe beh seh lou anahie. Thil jouse chu athah ngen ahi. Ahin, phat ahung chetoh kilhonna Christa a khantouna le pilhinna kineiyah ahin, hichu aumthei lou teng le adihlou tah khat um ahitai.

I Bible chang deilhen u chun "i-Pakaiyu le Huhhinga Jesu Christa milungset le hetna a khangtou jingun tu le tonsot geiyin loupina ama a um hen. Amen (II Peter 3:18) atie.

Pilhinlouna hettheina ho ipi hin tem?

Lhagaova pilhing lou khat chun lhagao an Pathen thu chu apom joupoi 1 Cor. 3:2, "Keiman nangho an-guma vahlouva noitwiya kavah bou nahiuve, ijeh inem itile hilai chun nahepo laiyun ahi. Tujengin jong nahetheipo lai yuve"

Lhagaova pilhing loulaiho chu vannoi chonin achon uve. 1 Cor. 3:3, "Nangho tugeiyin tahsa mi nahi nalaiyui, ijeh inem iti le nalah uva kithangsetto, kinahkiphun aum nalaiye. Ahile nahsa chonu hilou ham?Chule mi chonchona chon nahilouvu ham?"

Lhagaova pilhinglou khat chu

ahinkho man dan akitoi poi. Eph.4:14, "Chutia chu miho gitlou lungthim duha lhaa suhkhelna dinga, puichat veiya uma chule thuhil huilhoh lonle chapang ihi theilou dingu ahitai."

Lhagaova pilhinglou khat chun Thu aja'n, ahin anitin hinkhoa ajui pon ahi. James 1:22, "Ahin nang ho nangma le nangma kilhemilha athu chu angai mai jeng hilouvin, thu chu abola joh hiuvn."

Lhagaova pilhing lou khat chun Pathen thubul ho chu midang ahil thei pon ahi. Heb. 5:12, "Hitih chanpia hi nangho mihil thei nahi dingu ahitan, chutitah sangin khat touvin Pathen thubul kipatna jemho hil leu chun nangai kit tauvin ahi; chule anham hilouva bongnoi ngai nalai mitoh nabang tauve."

Lhagaova pilhing lou khat chu midang ngaichat sangin ama ngaichat joh akhohsah e. Philipians 2:3,4, "Moh ham hoithoa kilungdounaa imacha bol louvin, lungnem heochan khat in adang chu ama sanga phajoa gelcheh hiuvn; nangma nangma cheh ding jenga thil velouvin adangho ding jong veuvn."

Chapang naosen khat chun lam ajot theina dinga kal ahinson pat ding angai bangin, Christian khat chun lhagaova pilhinna dinga kalbi ahin sena ding ngaiyah ahiye.

LHAGAOVA PILHINNA DING KAL-BIHO

Kalbi #1: Khanletna dinga Ngai-chatna inei angaiye. 1 Peter 2:1,2, "Hijeh chun gitlouna jouse leh duha lhez lhahna jouse chule phat lhemna le thangset; chule kiseisetna jouse pai lhauvin, naosen sohthah bangin halpi beihel lhagao bongnoi chu ngaiyin umun, hichea chu huhhingna lama nakhantou theina dingun."

1. Tahsa lama khan nadinga, chapang akhangnom lou mi nakito khah em? Chapang khat in, "Kahinkhoa chapang hijing jeng katup ahi" ti nahet khah em? Chutah sangin, "kanu/kapa to-bang kahinome", ahilou leh Kum 18 kihitahen lang driving license kinei thei taleh katie' ti amahoa konin akijajo'n ahi. Chapang chu adung lam sang nom, smart jep, chuleh hat jep adeiyun ahi. Chapang ho chun akhanlet kal an-gahlal un ahi.

2. Lhagao thudola seidingin, Christian jousen khanlet ding angaichat u ngai ahi. Tahsa hi phat che dungjuiya akhan bangin vang, lhagao Khanna hi amachamin amoh umpoi. Ikhanletna dinga ngaichatna le deichatna ineiyu angaiye, achuti louleh umthei ponte.

3. Christian ihinau kum tampi ahung chetan, Pakai nikho seh a houkhomna a lhajinga, thupi tampi kisei ngaiyah, Sunday Schoola jong chejing jeh a khan-

let chomna ngaicha talou jong tampi umthei ahi. Paul in amaho dingin hitihin thu aseiy: "Keiman tuahi kanei ahitai, chule achamkima kahitai kati ahipoi. Christa Jesun keima eimat bangma chu keiman jong hichu kamat theina dinga hadella kadel ahi. Sopiteho, keiman kamantaitin kakigel hih laiye, ahin thil khat hi kabolle, nunglama umthil chengse chu kasumil in, masang lama umthil chu kadelin ahi." (Philippians 3:12-14)

4. Paul in ipi ase ihet theiyum? Aman ase chu ahile 'Keima hi kakhanglen jingin, kakhan bejing ding ahi' ati ahi.

5. Nang le kei jong Jesu banga hiche khanlet nomna lungthim inei cheh u angailheh e. Lhagao va pilhinna dinga kalbi masa khat ahi.

Kalbi #2: Khanletna dinga lhagao An neh jing ding angaiye

Matthew 4:4 Ahin ama'n adonbut in, "Mihem changlhah jengahing lou ding ahi. Pathen kamsunga kona thupot chengsea bou hing ding ahi" ati.

Mi khat chun an neh ding duchatna anei toh kilhonna an aneh jing ngai ahi. Niseh a aneh lou teng tahsa a thahat louna le lungthima boina anei thei ahi. Chutima banga lhagao an (Pathen thu) aneh jing ngai ahi.

1. Pathen thu niseh a simjing louho chu tahsa an ngol jing ho-

banga lhagaova lhahsamna le boina anei tei ding ahitai.

2. Christian tamtah hon Pathen thu simhi idei le sim ding (optional) danin agel un, adih poi. Pathen thu hi niseh a sim tei tei ding ahi. Jesu'n aseiyi: "Nangho kathua hi naum jom jinguva ahile kasei jui tahbeh nahiuve, chule thutah chu heuvin natin, thutah chun nalhadoh dingu ahi" ati (John 8:31)

3. Niseh an phapha hi chapang khat khanletna dinga ngaicha tah khat ahi. Minu-mipa phaho chun achate anneh-twidon ding akhohsah l'heh jeng uve. Chapanghon kailhanga umho (junk foods) aneh sanguva an phatah aneh diu adeipeh uve.

4. Chutobang chun Christian ihinauva Pathen thu hi ikhanlet na diuva poimo tah chu ahiye.

Il Timothy 2:15 Nangma kipatep them chang banga Pathena kipehna dingin gunchun ponpanin, jachatna beihel natong mi hin, thutah thu chu jangkei chan mangchan.

ACTS 17:11 Amaho (Berea) chu Thessalonica miho sang chun aphajouvin, lung kipah tah in thu chu asangun, hichu hina hilou ham ti hetna dingin niseh in Pathen lekhabua ahol jiuve.

5. Pakai nikho seh in Hou-in ah ihung jiuvin sermon le Sunday school ikaiyun ahi. Hiche bouhi ingenseu le lhagao anphatah

chu lhinglou ahi. Pathen thu eima'n jong sim jing ngai ahi.

6. Tahsa an chu hapta khat a khat vei ahilouleh nivei bou ineh a ahile ilhahsamdiu keo hilouva ithilo theidiu ahiye.

7. Lhagaova khanletna ding igelkhoh le niseh a Pathen thu sim jing le taojing hinkho man angaiye. Hichea dingin abailam kiti aumpoi.

Tun abana kalbi thumna a cheu hite.

Kalbi #3: Khanletna dinga Lhagao Exercise ingaichauve

I Timothy 4:7b, 8: Pathen ngaisahna lama them kihasinin. Tahsa lam kisinsah hi phatchomna themchacha ahi, Pathen ngaisahna lama kisinsah hi ima jousea phatna ahi, ajeh chu hichu tu hinkhoa dinga jong khonung hinkho dinga jong thutep uma ahi.

1. Ahinkhoa lhaitet golseh boldia kigo ho namukhah a athepdan/ahatdanu nalung dong em?

Tiger Woods kitipa hi golf kichem minthang ahin, nikhat a nidan 7-8 sung kichem tei ji ahi. Michael Jordan kitipa jonghi Basketball a kichem minthang tah khat ahin, ama jong niseh a nidan 5-6 kikah a kichem jing ahiye. Dr. K. Anders Ericsson in akichemho professional ahina diuva ngaichat amudanin mikhat chun kum 10 beh ahilou le nidan 10,000 beh kichuhna ahinkho sung a anei tei

angaiye ati.

2. Hiche dan hi lhagaova khandouna le pilhinna dinga kitoh ahi. Christian tampihin hapta khat sunga nidan 2 vel bou kigotnan aneiyun ahi.

3. Pakaiyin nang le kei lhagaova pilhinna inei na diuva eideipeh u dungchan iphah diuva ahile niseh a Pathen lama kisinsah (exercise) jing ding angaiye. Ibolding masaloia gelna, ikiman chahna, iphat mandan hoa chenna, itohna/iloulhona, jilna muna, chule iboltheina houva manchah na le kisinsahna ngaiyah ahi.

4. Christian hinkho hi Pakai nikho jingkah kivona, nilhah a kikhel ding ahipoi ti ihet u angaiye. Baptized ichan uva pat a Ama toh ihinkho pumpia kikhen lou ding hinkho ahijoi.

Kalbi #4: Khanletna dinga Phat alut in Ngahatna ingaiyun ahi.

JAMES 1:2-4 "Kasopiho, nangho patepna tintanga nachuh tengu le hichu kipana'n gelun. Natahsanu kipatep chun thohhat asosah chu heuvin lang chule nangho lhahsamna beihela na chamkima napilhin theina dingun, thohhatna chun anatoh tong chamkim molso hen".

1. Ichate naosen ahi lai geldoh leuhen, ihmud sah dinga jalkhuna isel tengu le ajinga analen pai jeng ding gela koi ium uvem? Koma umponte, ajeh chu naosen

ahung khanletna dinga chu phat lut ahi dan iheuve. Ahin khonung peh a inungvet a ahile gangtah a khang danin kilang inte.

2. Lhagaova khanlet na le pilhin na dinga chutobang ma chu ahi. Jankah a khang akiumpon, phat lut a ngahat ngaiyah ahi. Huipigopi itouva lhepna tintang ihin thoh u angaiyin, gal tampi isat angaiye. Chule mol tampi kal a lhang tampi jot angaiye. Hichea ikijit jahna chun thahatna le Jesu Christa toh kinaina cheh eisou ahi.

THUKHUMKHANA

Mi jouse changval hihen kiloikhomna hijong le imalam jousea khandouna leh pilhinna ding hi Pathen lungdei ahi. Khanletna dinghi ama chama hung kon hilou ahijeh in, kalbi phabep angaiye.

Kalbi #1: Khanletna dinga Ngai chatna inei angaiye.

Kalbi #2: Khanletna dinga lhagao An neh ding angaiye

Kalbi #3: Khanletna dinga Lhagao Exercise ingaichauve

Kalbi #4: Khanletna dinga Phat alut in ngahatna angaiyin ahi.

I-Pakaiyu le Huhhingpu Jesu Christa milungset le hetna a khangtou jingun tu le tonsot geiyin loupina ama a um hen. Lunglut tah a simho jouse lungunga Pathena konin Kumthah vangboh changchah hen lang Christian pilhingtah soh taken. Amen.

PAKAITOKILHONKHOM

(Walking with God)

(Bible Luke 2:1-15)

Pastor Seikhogin Haokip

Sermon

Hiche article sim jouse nabon uvin kum thah Chibai kahin bol uve. Kumbul ahi toh lhonin kumsunga hinkho manding dan le khosah dingdan mitampi in ina kigotchai tahdiu Jong katahsan e. Leiset hinkho hi kholjin hinkho ahin phatle ni ache a achal banga hi ihin khou jong chejinga chaljing ahi. Hiche hinkho kholjin lam ijot nao ah-hin, ilam kaidiu le eiki lhonpi diuvin Pakai ingaichau vin ahi. Hijeh chun Pakai to kilhon khom aphantdan le aloupi dan ana point thum thum tobangin ana veuhite.

1. PAKAI TOH KILHON KHOM HON PAKAI LOUPINA AMU JIUVE: Is-rael te Chu Egypt gam ma konna Cannan gam ahin jot uchun Pakai in ana kilhon pin ahi. Sunteng meilom in aki lah in ama sang uva ache in janteng meikong in aki lah in amasang sang uva ana chen ana kilhon pin ahi. Ahin Israel chaten Egypt ahin khel khel uva ato masat pen u chu boina len tah leiset mihem in a suhlhap thei lou boina len tah chu ana hi. Mihem tampi laha chu chapang, numei, naosen, numei a chunggih, chule gancha le thil le lo tampi Jong hina

lai ahi. Hiche ho jouse pumma a aseiyuvin, "Egypt gamsunga Chu tuipi San palgal Kai ding kivuina ding lhankhuh tampi chu mihem lunggel meimei ding umlou jeh a nang- man keiho hi chun ahithe i din ana gelpouvin hikom gamthip noiya hi thigam Israel te chu ana kiphin uvin ahi. sah dinga neipui mangu hinte chujongle amahon Mose jah ong? I-neilo monguva keiho hi

Egypt gama kona neihin puidoh mong mongu ham? 'Neidon dauvin lang, keihon Egypt mite kin bol nauvinge,' tia hiche hi Egypt gama chu najah a kaseijiu hilou ham? Ajeh chu keiho dinga hikoma gamthip noiya thigam sangin Egypt mite kin bolpeh ding chu gamchenga pha cheh jo ding anahi," atiuve. Hichun Mose'n mipi jah a aseiyin," Kicha hih- uvin, pang det' uvin, chule vetauvin tunia hi Pakaiyin nangho dinga nahinbolpeh diu huhhingna khu; ijeh-inem itileh tunia namuu Egypt mite khu nanung mukit louhel diu ahitai. Nangho ding det pou pouvun, Pakaiyin nangho dinga gal asat ding ahinai," ati. Pakai to kilhon vanga hahsatna tolou ding tina ahi pon ahin Pakai to iki lhonteng hahsatna hoa konna Pathen loupina kimu ji ahi. Seijui ho Chu Jesu to konga atou khompet uvin huipi ahung kinongin kongchu ahin nuhtan ahi le seijui ho aki chauvin ahin Pakai a thokhah phat uvin Pakai thil kidang bol Chu amu taovin ahi.

2. PAKAI TO KILHON KHOM HON GALJO NA ANEI JIUVE: Gamthip gama kum 40 sung Pakai to hungkilhon khom Israel te chun gamtep gam ahin jot sung uchun gal ijat hamkhat ahin sat uvin ahi. Ahin aki lhonpiu Pakai panpi nale

hatna jallin abonnin galjouse Chu ajou-uvn khopi ho Chu alauvin achainan Cannan gam Chu alo taovin ahi. Hiche galho hi Pakai in aban thahat ahin pat a Mihem thahat vanga hilou a galjo na ho Chu ahi. Tunia Jong isei nom uchu 2021 sung ijot nadiu va hin ito diu Tahsa le lhagao va galsat ding tampi ihin todiau ahi. Leiset hi galmun ahi, lhagao galsat ding atam e. Tahsa a Jong ipi gal nanei em? Damlou na gal ham? Vaichat gal ham? Ipi ham naki doupi? Pakai to naki lhonkhom ma ahi le Pakai thahat jalla najo ding ahi.

3. PAKAI TO KILHON HON LUNG-MONNA ANEI DIU AHI: Mihem te dia ngaichat umpen Chu chamna le lungmonna ahi. Tulai leiset hi ivet le lungmonna neijou louva, ama le ama kithat, neh phalou nea lungmonna kihol, sumle Pai neile gouvin lungmonna eipe diham tia dung lhei vailhei lhah mihem asang asang a um in ahi. Hinla chamna le lungmonna dihtah amu jou pouvin ahi. Horatio Spafford kiti mikhat ana umin amahi sum-kolvei mi lolhintah khat ahi. 1871 kum chun Chicago meikah na a chun anei agou jouse ana Kalhan ahi chule hiche kum mama chun achapa kum li bep Chu khosih in ana thisan kit in ahi. Hitobang

lunggen thei laith hin lunggen theiya um a jinu le achanu li ho Chu England gamma kihui lha ding in ana masollin ahi. Ahin vangset umtah in atounao kong chun Atlantic twikhanglen ah toset atoh in Mihem 200 tobangin ahinkho ana chanuvin hiche lah a chun achanu li ho Jong chun thina ana toh taovin. Hichea hin aji nu vang Chu ana sohcha in England a pat ajipa lekha ahin thot in Ka changin Ka sohcha e ipi Kati ding hitam atin ahi. Hichun Spafford injong ajinu um nalam jonna konga akitol na ah chun achate ho thina mun laith aphah u chun Captain pan hilai

hi ahi Kong ke na Chu tia ahin seipeh chun, tuikhanglen Chu aven, Chamna le lungmon kadin luiyin along, lungdon tuisanglen bangjungle, kahet dingdol se nangman neihil Chan Chu apha ta aphata kadingin, tin Pakai ya akingaina la Chu ahin seidohtan tuni geiyin hiche la hi lahing tahkhat ahi Jing nalaikin ahi. Pakai to kilhon hon Pakaiya kon Chamna le lungmonna anei diu ahi. Hichu gal lah a kon Chamna, boina lah a lung olna, hahsatna lah a kon kicholdo na ho Chu ahi.

Pathen in Asim jouse phatthei boh taken.

HEAD QUARTER FELLOWSHIP CHUNGA KIPANA



Kipa umtah in KBC Office a um Head Quarter fellowship te in Pathen natohna in KBC Main Gate chungathucheng kijihho akhang dungjui in hoitah le thupi tah in ahin sem doh uvin ahi. Hiche semna ahin Rs 85,000/- ana sulut uvin ahi. Pathen in athilpha bolnauva alejatja in phatthei boh jing tauhen.

Finance Secretary

Themjil chapang hole Service bol ho dia poimo tah thil phabep ho

Rev. Lunkhosei Tuboi

Secretary Youth Department KBC

Sermon

1. Time management (Phat man dan:

Nikhat sung hi 24 hours ahin, hapta khat ah 168 hours ineijun, thiltamtah bol nading'in phat hi alhom lheh jeng in ahi, (Don't study everythings. Study the most important things). Eimi te hi thiltamtah bol nom te aki hi nom jin achai na le ima cha akihilou lo jin ahi. Thilkhat na Master na hile nakihin so pi jouding ahi.

Pathen in phat manlutah eipieh uhi 'sum' tobang ahi. Sum in thil hoi/thil mantam achoh doh thei bang a phat naman thiem le success/pachan na namu ding ahi. Lekhasim phat niseh a normal exam pass nading bou hilou a natoh mu nadi competitive exams lolhin nadia niseh a 6-8 hours napieh jing le, hiche chun sum bang a lolhin na namu sahthei ma2 ahi. Hijeh a chu toppers ho kom a "How many hours do u study per day?" tia adoh jiu khu haimil hih in! Lou natong khat jong chun nikhat na 6-8 Hours apeh jouva ahile, thiltam tah atoh doh ding inchen khosah na a kilolhin pi tei ding ahi.

2. Self-Discipline (ichang a kigahna)

Koi hijongle kigahna nei a chun hetna jeng jong anei ding ahi. Kahag na kiti hi thil bai chu ahidehpoi, ahin leiset a mi nasatah ho khu mithase a umpouve. Atamjo matah2 a kithou a natong ngen ahiuvin. Themjil chapang dia jong matah a kitho a lekha sim kal a pha a umpoi. Alarm clock or wall clock khat neitei angai e. Itho tho teng le istudy table kom a kitun paipai chu bai louhel ahi. Lou natong khat dia jong kima tho a inatoh namun malhun ding kiti chu abai ahideh poi, hijong le hiche akima tho a matah a na atoh jeh a chu midang sang a phat jong atam man ding chule na jong tam pi akito doh jou ding tin a ahi. Lolhin thei nading a chu kigah na neiding poimo ahin hahsa lheh jong le self-discipline neiho dia jolal kiti hi um behlou ding ahi. Bible a disciple kiti le discipline kiti hi root word (thucheng kipatna) kibang chet ahi. Hijeh a chu Christian hiya student/themjil nahile discipline chu nanei tei tei akhoh dan nahet angaijin ahi. Hichun phat mandan nahil di ahi. Kigahna neilou chun phat amansah/waste time bep in, alolhing thei poi.

3. Like-minded friends (Lung kito pi/themjil lam a guol nei ngai):

Guol kilhen thiem angaijin ahi. 'A person is known by the company he/she keeps' kiti khun i tobang guol nanei ham hichun nahina itobang mi nahi aphondoh ahi 'akiti chule "tell me who your friend is, I will tell you who you are" kiti jong hi heimil poute. Lekha sim/natong nom lou mithase ho chu peldoh tei angaijin ahi, lekha sim/natoh lunglut ho bou toh kikop jing in. Chutile thanopna/motivation nanei be cheh cheh ding, hichun lolhinna lam a napui lhung ding ahi.

4. Setna chu phatnan jou jon (Rome 12:21):

Navel a koima lekhasim/ natong nom a umlou jong le, nang in sim pan/tong pan jieng in! 'Role model' (vet ton thei) namu loule nang himasa phot phot in. Mithase hon nang hinkho a kon a pot-tho na amu teng ule nang in ama ho chu 'inspire' nabol a nakhel thei ahi. Amasa in nangma kikhel masa phot phot le chun.. "Be transformed from within" (Romans 12:2). Vetton thei hinkho naman nadia chu Lhagao theng panpi na ngai jing ahi. Lhagao theng kipui sah tei go in...

5. Be positive & Make Each Day Count:

Niseh le ihmud a pat natho tho taona naman teng " Pakai tuni hi nikho pha, khan tou na nikho,

lekha het theina nikho/ natoh doh na nikho, phatthei chan na nikho, nang toh kinai cheh na nikho hisah in" tia na tao jing ngai ahi. Nahatsah pa vang a thil pha tampi nabol thei nadia hinkho naman ngai ahi. Hichu Bible toh kitoh, pachan nadia hoitah ahi. Tulai phat kijen petcha a hi thil thah thah thil hoi hoi hetbe dia kitet na khang chu ahitan, pan nalah ngaijah ahi. Knowledge/thep na chih na chule natoh thei na hol jing ding hi mi-hem hinkho adia poimo tah phat chu ahijing in ahi. Hetna holnom chun (success) lolhin na amu vah ahi. Hichu tuni nikho ahi ngai ahi, lungthim hoitah phatah (positive mind) kenjing ding apoimo lneh jeng in ahi.

6. Don't Give up: (Moh ngah hih in).

Nalungtup nathilgon ho ahilou le nalung toh akito lou teng, napha natoh(good work) moh ngah hih in. Lolhin na (Success) chu namoh mulou maithei ahi, ahin thangtom tah le gunchu tah in pang jing in. (Determination) abidoi mun kicheh tah chu nanei ngai ahi. A chuti loule khatvei nivei na losam/fail teng "akichai kahitai" tia thilpha bol namoh ngah khah ding tijat umtah ahi. Hichu eile ei kijoulhep na ahi. Abraham Lincoln President ahi masang a khu ijat vei losam (fail) ham? Election getvei jin (8 times fail) losam ah ahin, business nivei (2 times fail) nervous breakdown/lungthim

buoitah a chomkhat ngoldoh leu vah ahin, alungset pen nu in jong anathisen nalai jah ahi. Ahin "give up" abol lou jeh in USA a 16th chan na President chu hung hithou thou ah ahi. Hiti jeh chun nanatoh nathilbol, na themjil na hijong le khatvei lhahsam jeh in moh ngah phot kigot hih in, lolhin nahi genthei na lhel la um ahijeh in hahsat na genthei na kiti chu khokal kigo teijin.

7. Be Honest: (Mi kicheh midih nahi ngai ahi)

Mi kicheh/midih nahi ngai ahi. Kicheh chet chet na hinkho na-man le Pathen jong kipah ding, min jong natahsan ding ahi. Mihem tampi kicheh lou, mijou minal ho society a koiman amu nom lou ahi. chule mun jong neocha bou anei jiuvin, mi vetda le tahsan lel na mel in bou aum jiu vin ahi. Ikam tam sah loudi, na hatoh ngai ahi. Lekhasim chun hasim a asim ngai ahin/ natong ding jong chun na hatoh a atoh ngai ahi. Honest kiti hi natoh a vetsah ngai ahi. Hoitah a imalam jousea phat mandan hihen lang, natohna hihen ipi pi hile kicheh tah a (honest) tah a hinkho man jing ding ahi. Chingthei tah a um a koima kilhep lhahsah louding hi hinkho a athupi pen na gel ding ahi.

8. Service bolhi ipi ham?

Eihon service bol itiu hi thildang ahipon, mi na kitong tina ahi, Keijong hi Pathen na katoh ahi,

(Servicing to Gods Kingdom).. Govt. natong hojong Government a dia na atoh u ahin, hiche itoh jeh uva chu kiki hinso ah ahi.

Service hi inchen kisem nading, kihin so nading'a bol angaijin, konkhat in ama hinkho kisuh set nading le kitha lih nading'a hinkho mangpi loi jong tampi akium doh in ahi. Pachat umtah khat chu Pu Paotinmang Dounge IPS hinkho man le Pu DP. Haokip IRS hinkho man chule adang dang jong aum nai, A Service u khu inchen kisem nading le kihin so nading in amang uvin, aphot neisun un thilpha bolding ahol jouvin, ama vang Service neocha cha neiho hinkho akivet na ahile a service jeh uva thivah ding ngen atam lleh tan ahi.

Thilpha boldoh nading in vang hah jong ahahsan, boljong abol hah lleh jeng in ahi, ahinlah, lekha lam thep jil nading hihen lang, ipi lam pi a thepjil nading hijong le hahsat namun na bou pachan nale lolhin na thuguh aum jing e. ti sumil louvin, tukum 2021 sung'a nalolhin tei nading in gunchu tah le kitah tah in chule pontho tah in tup le doi kicheh tah neipum in malam ah kalsong jom jing u hite tia Pakai min na tem na kahin nei u ahi. Kakipah'e.

Pathen in hiche Article neocha hijong le asimjouse phatthei boh ta hen.

LOLHINNA DING KALBI HO

*Tingneihing Kipgen
Women Secretary, KBC*

Sermon

Pathen lungset na jal in Pakai kum 2020 igalkai taovin ahi. Kumthah 2021 toh ihung kivop khom pan kit taovin ahi. Hiche toh Ihon in mijousen kumthah sunga Pathenna kon phatthei channa ding leh tohga so na ding in mimal, insung, houbung chuleh khosung level in anngol taona chomchom ina mang jiuvin maicham semna ho jong ineijiu vin thilpha tah in kagel le. Mijousen ibolna itohna cheh a lolhin ding akidei cheh in ahi. Hiti ahijeh chun lolhinna dinga hetlouva khoh kalbi phabep noiya hinchom cha chan ana vekhom uhite: Miman tam na hi geldoh jing in: Miloi khat in ama a um thilpha ho muthei lou vin aumjin ahi. Hiche chun lung neo na leh kison lel na aneisah jin ahi. Midang toh kitekah jinga lung oimo keijong umthei ahi. Lhinlelna, hatmona, theplouna leh hoimona ijatnei jongleu

hen isuhmil loudiu chu Pathen in amalim leh mel a loupitaha eisem ahi ti hi igeldoh jingu angaije (Gen.1:27). Chuleh Pathen chate chu Pathen in thilbol theina dimset Jesu Christa lhagao theng jong eipeh ahitai ti igeldoh leh kisonlelna ding leh lung neo na ding imacha um ponte (Rom 8). Paul in eihatsah pa vanga ijakai bolthei kahi ati chu geldoh jinga pha ahi (Phil 4:13).

Nangma leh Nangma kitahsan in: Eima leh eima ikitahsan joulou phat aumjin ahi. Eima leh eima kitahsan na aumlou leh Pathen tahsan na leh midang tahsanna

iti ineitheis ding ham thil hahsa ahi. Hijeh chun lolhinna dingin eima leh eima jong kitahsan ngaija ahi. Ama leh ama kitahsan na neilou hon thil jouse a jolou ding in agel jiu vin ahi. Hiche lung put chun losapna eilhut jiu ahi. Moh Hai san jeng hih in: Thil khat tup ma khat vei ni vei ja amol so joulou leh kihai doh henno tia moh ngah nom jeng aki um in ahi. Ama vang loikhat chun aboljom jinga ahileh achaina leh lolhin na aneijin ahi. Hijeh a chu nathil tup na hihen lang natoh na hijongleleh lolhin nanop leh moh haisan jeng ding go hih in bol

jom jing in chuti leh achaina leh lolhin na na neitei ding ahi. Boljeng in: Boldinga pha, seidinga pha, chena dinga pha ahilou leh neidinga pha ahiti he a ahivanga bol ngam lou ho chu lolhing ngailou ahi. Apha ahiti ihet leh chelhah pi jeng hin lolhin nakhat ahi.

Aban ban in bol in: Chopkhup, kalchuh a lhai loiloi jeng chu lolhin na hidehlou ahi kitne. Moh hat a hat jong lolhin na ahideh poi. Ol ol a aban ban a kalbi lah hin lolhinna eipeh ahi. Lo lhinna ding in Kal khat khat in machal in. 100 metre race hilou vin maratho race joh hiding ahi.

Ipijeha um/hing kahim ti kiholdoh in: Mihemkhat in vannoiya mihem khat na ihung pen lona ajeh helouva lolhin ding hi thil hahsa ahi. Thil le lo nei le nga ichoh hou hihen lang ikisem hou hijong leh apan na ding aum jeh a ichoh uva chuleh ikilam doh jiu ahi. Pathen in mihem te hi ipidinga eisem u ham ti ivet leh ajeh tampi lah a phabep gah tah lang leu hen: Pathen jana nei ja ama thupeh nit dinga eisem u ahi (Eccle 12:13). Ama loupina dinga eisem u ahi (Isaiah 43:7; I Cor. 10:31). Athilsem dang ho jouse veng tup ding leh vesui dinga eisem u ahi (Gen 1:26,28). Ama vahchoi dinga sem ihuive (Ps. 150:6). Ama houdinga sem ihuive (John 4:24). Chuleh atohban tong dinga ngasena chang ihuive (Matt 28:19-20; John

20:21). Pathen in eisem lona ajeh hoi tah a ihet chet teng leh lamvai na ding leh thaset na ding phat um pon te.

uni kiti nikho hi thupi tah in gel in: Phat kiti hi iman them lou leh lolhin lel na hinkho eilhut thei ahi. Achesa jong inung kou thei pon ajeh chu nang le kei khut na um lou ahitai. Ahung lhung ding phat jong kinep pi thei ahipoi ajeh chu imu imulou kihe lou ahi. Tu kiti phat vang hi nang le kei khut na Pathen in iman chah dinga ei peh ahin, hijeh a chu hom tho tah leh kitup tah a iman chah leh thilpha tam pi boldoh na a iman thei ahi. Hijeh a chu Paul in Ephesia 5:16 na a phat kijen pet cha kichoh un ati ahi. Naphat mantam tah chu Pathen in loan na napeh ahin ching thei tah in mang in.

Tahsanna dettah nei jin: Tahsan na leh kinep na bei jin imacha akitong doh jou poi. Tahsan na hi kinep na thil ho hetchet na, mulou thil aum monge tiphot chet na ahi (Heb. 11:1). Mihem in ibol jouse hi kinep na leh tahsan na pum a lolhin na kinei ji ahi. Thoh hatna: Lolhin na dinga kalbi khoh tah khat chu thoh hatna ahi. Jacob Bible in hitin asej je: "Lhepna thoh ham ham a chu anunnom ahi, ajeh chu lhep patep na chu ajo a them achan jou leh Pakai jin ama ngailu ho peh dinga athutep sa hinna lalukhuh chu apeh ding ahi" (Jacob

1:12); " ... nang ho lhahsam na bei hel a nachamkim a napum lhin theina ding un, thoh hatna chun ana toh tong cham kim molso hen" Jacob 1:4). Lhagao hin kho hihen lang tahsa hinkho hi jong leh mihem in thoh hatna inei lou leh lolhin na leh pilhin na akinei thei pon ahi. Hijeh chun thoh hatna in kivon u hite hichu lhagao ga lah a khat ahi (Gal. 5:22).

Nanei kham kham chungga lung lhai jin: Mihem lung gel hi kipap set na leh kilosetna dim ahi. Ahao pen in jong phatan te ati thei hih beh in ahi. Hijeh chun ipu ipa thuchih in "haovin be angai je" ana tiu hi adih e. Chan chungga lung oi thei lou ho hinkho agenthei jin kipana leh lung ol na jong anei thei pou vin ahi. Paul in Phillippi 4:11-13 sunga itobang din

mun a umjong leng lung lhaisel a umje kakihettai atin ahi. Hiche thuguh chu koija kon a akimu ham iti leh chang 4 na a sei je "nang ho Pakaija kipah thanom jing un" atin ahi. Paul in Timothy ana tilkhon na a "lung lhai sel a Pathen ngaisah hi phatchom na tah ahi" atin ahi (I Timothy 6:6). Lunglhain a chamkim chu Pathen na kon bou ahin, hiche nei hon lolhin na anei jun ahi.

Hijeh chun sopite kum bul a kipat hin kumsunga ithil gon hou le itoh gon hou hihen lang eima changval hin kho a hijong leh lolhin na inei thei na diu vin chungga kisei kalbi 10 ho a hin pan sao hitin kal song uhitin hileu hen ilolhin tei diu Pathen jal in tahsan na leh kinep na lentah aum e. Pathen in a sim jouse phatthei eiboh tao hen!

Houbung thah K. Gamnomphai

Houbung Thah Lahlutna



Date 7.1.21 nin KBC General Secretary Revd. Dr. M. Thongkhosei Haokip in **K. Gamnomphai** houbung KBC Gambih no. 4 Houbung khat in lah lut na anei tai.

Men Column

*Rev. Tongmang Haokip,
Secretary, Men Dept.*

Hatchung nung Pathen in, 2021 kumthah damma ehinpui lhung tah jehun, Pathen thang vah un umjing taken, chule pakai lengpi leija toh khompi Pate hojouse kangailutnao kum thah Salam kahin boluve.

Achesa Dt 9th-11th December 2020 40th channa Annual Men Department Assembly Gothol Baptist Church Gambih NO. 8. (EMP) munna pathen mapuina jalin lolhing tah in Assembly anakiche lhan pathen thangvah in umjing taken.

Assembly sunga kiman chahnaho:-

Assembly sunga jingkah nilhah in Pathen Houkhomna kaikhomna chule Seminer jong akinei jin ahi. Dt 9th Lhun kim nilhalang niden 4.00PM in, Pu Lienboi Singsit in Assembly Pon lap khaidohna anei jin, Khonei Youth hon Pathen vahchoina Labung asaovin, Rev. Tonglet Haokip President KBC in, Pathen henga taona amangin Assembly thenso ahitai. Nilhah houkhomna ah 2020 sunga Pate hinkho lh- inga anachemasaho geldohnale jana akinei jin, Rev. Paosei Haokip Gambih NO.11 Pastor in adalhah insung miteho dingin, pathen henga taopehna anei in, chutoh kilhon in Khonei Pate in Pathen vahchoin na Labung asaovin, Rev. DR M. Thongkhosei Haokip General Secretary in pathen thu asei in lolhing tah in kaikhom akichaije.

Dt 10th December 2020 Jingkah Devotion:-

Jingkah Devotion in, Rev. DR Paotinthang Chongloi Pastor Gambih NO. 8 in Pathen thu eiseipetun, Chutoh kilhon in Seminer akinei khom kitin, "Lhagao lam ma mipa dinmun", Natutu na atding hije, Rev. Demkhoneh DOUNGEL Resource Person hinna in Seminer akinei in ahi Seminer kichai in Assembly akibanjop kitin ahi. Nilhah kaikhomna akinei kit in, Ng Veikhohoi Haokip in pathen vah choina la asan L R C a ding in tokhomna aum in Rev Kaikhokam chongloi in thensona amangin ahi. Matijang Houbung Youthhon, Pathen vahchoina Labung asaovin, Pu. Lienboi Singsit President Men Department KBC in Pathen thu eiseipeh kitun ahi

D t

11th December jingkah Devotion :-

Songdo Baptist Church Youth hon, Pathen vahchoina la asaovin, chutoh kilhonin, Rev. Helkholam Lhouvum Secetary Mission & Evangelsm KBC in, Pathen thu eiseipeh kitun, hitoh kilhon chun Seminer akinei kit in, Pu Semthong Haokip Edify North East India “ Pathe lung deilam ma sum etihola kahan touding ham”? ti thupi mang chan Seminer ana kinei khom in ahi. Seminer kichai in Assembly akibanjop kitin ahi. Assembly akibanjom toh kilhin in Election akinei in Lamkai tha lhenna aumin ahi.

2021 –2022 a ding Lamkai thahho:-

1. Pu Seikhohao Vaiphei President
2. Pu. Kaikholim Haolai V/President.
3. Pu.Thongkholal Haokip Recorder
4. Pu. Donghen Haokip Member.

Achung a amin chong changsehi Pathen le mipi dei dungjuijin lhen doh ahitai. Lamkai thah kilhentoh kilhonin Assembly akichijin Assembly khumkha na dingin Pu Thangtinhen Dounel V/ President in Assembly ponlap khailhahna aneitoh kilhon 2021 Assembly umnading Gambih NO. 15 Men Chaiman le Secetary in ponlap dopna anei lhon in Rev. Tongmang Haokip Secretary Men Department in pathen henga taona amangin Assembly khumkha ahitai.

Kipa thu seina:- 40th channa Men Department Annual Assembly lolhinna dinga pan hinlaho jouse chung a kipa thu ahung kiphonge , adeh akhonei aHoubung mite jingkah nilhaha Anneh tuidon phate cha eivettuppehuva, lupna touna ejakai phate cha eigontuppeh jehun achunguva kipa thu sangtah in ahung kiphonge , Pathen in phattehei boh jing taohen.

Phaichambung gambih no.16, Khopi Maicham le An ngol Taokhom na



Achesa 10/1/21, Phaichambung gambih no.16, Khopi Maicham le An ngol Taokhom na akinei toh lhon in kumthah a Manchah ding Hemle thal, Manchah jouse le Muchi Chivo ho jouse, lhan doh na gambih Pastor Thangkhomang haokip in anei tai. Pathen in Houbung mite hamphat na le vangphat na hin pe ta hen.

Women Column

*Ms. Tingneihing Kipgen
Secretary Women Department*

48th vei lhinna KBC Women Department Assembly lolhing tah in akichai tai:

Covid-19 jeh in lung opkai na tam tah ana um jong leh Pathen lungsetna jal in December 12-13, 2020 sung in KBC Centre Church Kangpokpi mun na KBC Nute Assembly ana kibol in ahi. KBC gambih 19 ho a kon in thalheng ahung in agom in Assembly delegate 80 akikhom doh in ahi. Convention Women Secretary leh Gambih lamkai ho a kon in tohphon ho akingailhan ahi. Boi kum hijong leh Pathen lungsetna jal in Convention hihen gambih ho hijong leh machal na tamtah muthei jin aum in Pathen thangvah a ume. "Christa a pilhinna lam manou hite" ti thupi noiya Nu Vahboi Baite, Nu Hekim Khongsai, chuleh Miss Lhingboi Kipgen amaho chenga kon in mipi Pathen houkhom na thumvei kinei sunga Pathen thu ngailhah na ana um in ahi.

Lamkai thah kilhen na akinei jin noiya ho cheng hi mipin lung kitoh tah in kum ni term (2021-2022) a din KBC WD lamkai ding in lhen doh ahiuve:

Nu Hatneilam Haokip, Gambih No. 1 -President

Nu Hoilhing Haokip, Gambih No. 15 - Vice President

Nu Nengminchong Haokip, Gambih No. 5- Recording Secretary

Nu Kimneihoi Haokip, Gambih No. 21 - W/ Committee Member
Tukum KBC Women Assembly host eibol peh u Centre Church Kangpokpi te chung a kipa thu sangtah in akiphong in ahi. Anneh twi don twitah in eisem peh un chuleh gena jong kitup tah in eisem peh un ahi. Chuleh Covid-19 jeh a Government langa kon a dan leh thupeh thah thah aum jeh in Assembly kitou thei lou ding hitam tia lung kham a akium lai jin Houbung lamkai ho adeh in Pastor pa leh Secretary pun nasatah a pan ahin lah lhon na Town Committee Chairman toh ahung kihou toh uva kon a meeting kitou thei ahijeh in C/C Kangpokpi lamkai ho leh Town Committee Chairman pa chung a jong kipa thu sei jou lou vin akiphong e. Chuleh KBC Women Department thusim a ana umkha lou lai tuchunga Pathen in eimusah

jeh un Pathen thangvah na ipeo vin ahi. Hiche chu Pu Seiminthang Misao (C/C Kpi Secy pu chuleh Gambih No. 5 Chairman) leh a inneipi Pathen in ahin til doh a tuchunga Assembly delegate ho neh leh chah jouse sponsore eibol peh jeh un kipa thu giltah in akiphong in ahi. Eiho kivaipoh na a hiti tobang kikhopna len ho Houbung ahilou leh Gambih in sponsore abol jeng jong hi kikhat tah ahi, ahin tuchung in mimal/insung khat in hongphal tah a Pathen min a ahung kiphal nao hi Convention thusim a melchih dinga kikoi ding ahitai. Pathen in Pu Seiminthang leh a insung mite thilpha bol na lam a chimtih nei louva pang jing thei ding in phattheina thalhing set in petahen.

ADMISSION OPEN

Inchen genthei le boina chomchom jeha School kaijom talou Nungah chapang ho din Lydia Resource Centre, Churachandpur mun a 2021 a din Ponkhon jilna ding kot akihong e.

Koitobang lunglutna neihon Warden LRC/Secretary, Women Department, KBC kom a January, 2021 Ihasunga Application form lahthei ahi.

Changlei Baptist Church KBC a Lahlutna

Changlei Baptist Church KBC Gambih No. 8 January 10, 2021 (Sunday) jinglam nidan 7:00 in Churachandpur District Tuibong Sub-Division hopsunga um chu Rev Dr P Chongloi Pastor KBC Gambih No. 8 kinthempu hina in Kuki Baptist Convention houbung khat dingin Pa Pathen, Chapa Pathen chule Lhagao Theng Pathen minin lahlutna kin ana umtan ahi. Changlei Baptist Church akilahlut toh Ihonin KBC Gambih No. 8 houbung 31 alhing tan ahi. Kin- gon achun Gambih lamkai hon kilomtah in ana op uvin kipapina thuphon le kipa thilpeh jong ana peuvin ahi.

Lamkholen Kipgen Secretary KBC NO. 8

Development Column

KBC HOLISTIC DEVELOPMENT

Coordinator, Holistic Development Committee, KBC

KBC Holistic Development Committee le Abafarm kinoptona dungjui-ya KBC gamsung'a neh le chah theng (organic products) ahideh'a-Ahlu (Potato), Changnam (Onion) le Chado (Tea Leaf) hi lha seh (Every month) a peh (supply) ding tohgon akineiyin ahi. Hiche tohgon lolhin theina ding'a nangho Gambih in pan phatechaa hinla ding in Pakai min in hetsahna le temna ahung kineiyin ahi.

Hiche neh le chahho hi kailhang (Bazar) mun sang'a lhomjoa kipe ding ahin chule aboipiho ding'a jong themcha cha kigonpeh ding ahi. Aum ding dan noiya hi vet doh thei ahi.

Sl.Item/Neh le chah	- Bazar rate	- KBC rate	- Aboipiho ding
1. Ahlu	Rs. 200/- Per Kg,	Rs. 40/- Per Kg,	Rs 1/- Per Kg
2. Changnam	Rs. 154/- Per Kg	Rs. 40/- Per Kg	Rs 1/- Per Kg
3. Chado	Rs. 1,650/- Per Kg	Rs. 800/- Per Kg	Rs. 3/- Per Kg

Ahlu (Potato) hi Bag neo khat a 10 Kg hung kikhum (Pack sa hi) ding, Changnam (Onion) hi Bag neo khat a 5 Kg hung kikhum ding chule Chado (Tea Leaf) hi Bag neo khat a 1Kg hung kikhum ding ahin akichoh jouse in a bag a akichoh ding'u ahitai. Ahlu (Potato) le Changnam (Onion) hi lha seh (every month) a hung kipe (supply) jing ding ahin, Chado (Tea Leaf) vang hi lhani dan seh (every two months) a hung kipe (supply) jing ding ahi. Chule Gambih Center chan hin thah-lutna a sumlepai lut (Expenditure-ho) Office mopohna hi ding ahi. Thil man (Price) hohi kumlung keiya kikhel talou ding ahi.

Hiche neh le chah theng hi johson ding in phal ahipon chule Pathen houlouho kom'a joh ding jong akiphall poi. Ahinlah KBC hihij jongleh Christian kiti phot phot- Association, houbung, mimal, Hostel, College, Restaurant le Hotel-ho kom'a joh thei ahi. Akhoh dungjui le ngaichat ahidungjuiya Gambih sung'a Centre Church umho toh jong kijahmat'a amahotoh jong kitho khom thei hiding ahi.

Gambih/Church kigotna ding –

1. Lha seh'a Neh le chah kitup tah'a khol tupna ding Inn/Room semtup ding
2. Lha seh'a Neh le chah joh (Marketting) bol ding gon tup ding
3. Lha seh'a Neh le chah hung kichoh dingho phatea hetsah masat ding, atam theipenna johdohna ding ngaito ding

4. Lha seh'a Neh le chah ijat tobang ngaicha ham ti suhtupna nei ding
5. Neh le chah ahung lhun apat nikho thum sung'a neh le chah joh chai tei ding
6. Neh le chah kijoh chai tengleh akinthei penna Office munna sum le pai thah lutna um ding, hiche teng chule aboipi manho jong kilah thei hi ding
7. Record Book (List bolna) le Cash Book phatah'a man chah ding
8. Neh le Chah Theng (Organic Products) phatchomnaho mipite hetsah ding (Hiche thu noiya hin ahung kitahlang in ahi).

Neh le Chah Theng (Organic Products) kitihi anche louhing chule neh le chahho lou le ai jat jat jao louva leiset hoina le leithao hoina a kituho kiseina ahi. Tulaiya ineh ichah'u atamjo hi Organic hilouva lou le ai tha hatna (Chemical, Hampa lou, Haal chule lou le ai jat jat mang cha a) hung kibol ngen ahin, hicheho hi mihem tahsaa ding'a nat hungkon-dohna ahitai. Hiche jeh in igam sung uva Kal nat, Junlhum vei, Lun-chang nat, BP sang chule adang danghohi ahung pung lheh in ahi.

Organic thil ineh teng uleh tahsa damtheina le hatna um ding ahi. Chujeng seh hilouva tahsa damtheina akon tahsa suhatna aum tengleh dammona jatchom chomho akon jong kihoidoh jou ding ahi. Tehkahn in tuchunga hung ding Chado (Tea Leaf) hi phatah'a akidon leh Corona Virus natna akon jong nasatah a kivendohna apeh jou ding ahi. Tuni channa Bazaar a ichoh'u Ahlu, Changnam le Chado hohi eimaho tahsa ding'a natna le thina thei ngen ana hin chujeh in tu apat in KBC akon hung kitollut ding Organic thil ho ana kichoh'a insung mite le houbung mite jouse damtheina lam'a phatchom sah ding in tem ihuue.

Het ding khat chu KBC ding'a Organic thil hohi Maharashtra, Odisha le Sri Lanka gam akon hung kipolut ding ahi. Chule hiche thua akhoh dungjuiya dohnom neiho in Development Coordinator le Asst. Coordinator kom'a idoh ding uvin hetsah ihuue.

Eima mopohna cheh'a gel sang'a hatjo le hoijo cheh'a pan anala tei ding in tahsanna le kinepna lentah akineiyin ahi. Pakaiyin na umpi jing tauhen!

Pakai le mipi lhacha,
Rev. Dr. M. Thongkhosei Haokip
Chief Functionary, Development Committee

STS Column

STS ANNUAL PICNIC CUM PRE-CHRISTMAS CELEBRATIONS

Pathen mapui na jallin kum lhungin STS in kumsunga tohdoh dinga kigongho abanbanin ahung kimachal toupeh in ahi. Hiche tohlon chun tukum 2020 adia achaina penna boldia ana kigong annual picnic cum Advent Christmas Chu tuni 12th December 2020(saturday) in noptah le damsellin Haipi khokom a vadung nomtah



a ana kiche'n ahi. Hichea chun student hoa konnin solo, group song, games jatchom chom ho abol uvin chule Pastor Lalboi in Prince of peace ti topic a Pathen thu ngaitah ase in ahi. Lenkhom nomtah akibollin lamkol Jong akibollin ahi. Hitobanga lolhinna eipeuva hatchungnung Pathen Chu loupina changjing taken.



Taona Ngaichat

1. 13th December leh KBC No.4 Youth Dept Golden Jubilee a STS hojong Special item(lasah na) kachang uvin phatah a pan kaga lah uva lajong phatah kasah lhah theina diuvin muntinna Houbung mite hon taonan neihin geldoh uvin.

2. Pathen in phasah le 14th December (Monday) Nileh winter vacation kaki lhadiu ahi tan chule 3rd February le College kanung lut kitdiu ahi jeh in damsel a 2021 teng session ho aki banjom theina din neihin taokop jing uvin tin Jong ngehna kahin nei uve.

Rev.Dr. Paokhohao Haokip. Principal STS.

Office Diary

(November 2020)

December 1 : Elijah Prayer Mount Gothol mun ah, tumasang a KBC music committee lamkai na a Central Choir mi 9 ana kilah be ho Rev Dr M Thongkhosei Haokip, KBC General secretary in then-sona anei tan ahi. Hiche kin a hin, Rev Thangkhosei, music secy, Rev Lamkeng, mission secy, Rev P chongloi, Dr Ngamkhai mate, Education board chairman , pu Hegin Gambih no 8 chairman chuleh Gothol houbung mite jong ahung pang un ahi Tuhin Choir hon phat chom khat music committee, choir director gl Haoneo baite leh music secy Rev Thangsei lamkai na a lajil na aneijom diu ahi.

December 8 : KBC Worker- ho le ajiteuvin KBC Chapel Hall muna Pre Christmas Celebration ana nei khom u.

December 10 : KBC Development Committee le Abafarm in tu apat tohkhom theina ding in KBC Office, Imphal munah December 10, 2020 nikho in MoU signed ana kibol tai. Muntina Abafarm bol dinga min anapelut-ho in farm lei ding vat thenga chule 2021 February vel apat muchi tu theina dinga kigot pan thei ahitai.

December 12 : KBC Secretary-ho in Heikakpokpi, Chandel District mun'a khomulouho umna (Blind School) vilna aganei uvin taopeh-na le thilpeh jong aga peuvin ahi.

December 12 : KBC Secretary-ho in Twinom, Churachanpur District mun'a tahsa bukim jeplouho (Differently-abled School, Twinom, Lamka.) vilna aganei uvin taopehna le thilpeh jong aga peuvin ahi.

December 15 : 48th Youth Department Annual Assembly G. Kholep Baptist Church munah lolhing tah in ana kichai tai.

December 21 : Vangset umtah in Pastor Limmintang Zou, Retd. Pastor, KBC in tahsa hikho mollemna ana neitai. Hiche kin achun Office akon in Secretary-ho in ahung op uvin Rev. Lettinlal Chongloi in vuilemna ana neitan ahi.

DIARY

CENTRE CHURCH LE GAMBIH-HO

(November 2020)

December 1 : MBC Gambih No 15 Nute hon Nute kiphudoh kal kum 53 lhin na amang u vin ahi.

December 3 : S.Khothah, KBC No. 9 a Ng Themneineng kilong gollhah na kin ana kibol in ahi.

December 3 : Vangset umtah in KBC gambih no. 7 hopsunga um Joupi B/Ch. muna um Pa Thongkhojang Haokip damlou jeh a kijen jinglai chun eina molliem san tauvin ahi. Ama hi Joupi houbung a dinga houbung lamkai anapang jing ahitoh kilhon in tu le tua jong M&E secy. panmun atoh jing lai ahi. Pathen in adalah insung mite umpi jing tauhen.

December 4 : Ng Vahneimoi Haokip Hou danthenga, Chassad Avenue Baptist Church, KBC Gambih No. 1 chu hou dan Thenga jinei ding in Rev. Tunlal, Gambih Pastor kin thempu hina in lhahdohna ana um tan ahi.

December 4 : Sibong Khudengthabi Youth Department Golden Jubilee lolhing tah in ana kimang chaitai.

December 4 : Vangset um tah in tunin Litan Sareikhong Houbung'a um Pu. B. Lunkhomang @Kumar Baite chu jingkah pung 8:00am vel chun angailut a insung mite leh houbung mite dalhan leiset hinkho ana bei tai, adalah insung mite Pathen in lhamon na pe taken.

December 4 : Vangset umtah in Gelbungjang (Twilelon) a um Pu Chungsei Haokip(Malsawm Bus neipa) chu a imutna a ana mollem tai. Adalah insung mite jouse Pathen in lhamonna lhagao in umpi hen.

December 5 : KBC Gambih no.8 Men Department gonna noiya PATE ANNGOL TAOKHOMNA chu OIha Nisim 5 nin Tonglhang Baptist Church munna akineiyin lolhing tah in chai ahitai. Rev. Lensei Kipgen Retd.Pastor KBC in taokhomna program Pathen henga lhandohna an-eijin, Rev. Dr. P. Chongloi Gambih Pastor leh Rev. Paolun Haokip Pastor Centre church S. Kannan veng, Ccpur tenin taokhomna alamkai

Ihon in Gambih sunga Pate mi 75 ahungpang in ahi. Pu Peter Ngam-sei Haokip, Pa Haoneo Haokip, Pu Lalchon Kipgen leh Pa Mangneo Haokip in Pathen vahchoi ngeitah tah asauvin taokhomna tahsa leh lhagao in akihalchom lheh in ahi. Pastor Sonlet Haokip Retd. Pastor KBC in taokhomna khumkhana aneiin program chai ahitai. Hetthei khatchu Gambih Pate taokhomna hi kumsunga thumvei boldia gon ana hin, Cov-19 Pandemic jeh in khatveibou bol in aumtan ahi. Pathen in Pate jouse phatthei boh taken.

December 6 : KBC Centre church Tujangvaichong in Kum 83 Lh-inna Nute Nikho chu “Minu Mantam” Prov. 31: 10-31 thupi in akimang in Pastor Henkhomang in Tilkhou na kitet na jatchom chomtoah gom in, Noptah in Pathen Loupi na dingin ana kimang tan ahi.

December 6 : Vangset umtah in KBC C/C New Lambulane Houbung a Houin Lhacha a ana pang tua C/C Tuibonga chengta Pu Thongngam Mate chu tuni jingka in angailut a Insung mite, Houbung mite leh Vengsung mite dalhan Pa koma choldo achetai. Pathen in adalhah insung mite lungmonna pe jing tauhen.

December 6 : Tunin Kuki Baptist Convention (KBC) Gambih No. 12 in Gambih a Sunday School 2020 (Daniel sung) kumlhun themvetna chu Gambih Centre, Chahkap Baptist Church mun a anei uvin ahi. KBC Gambih No. 12 sung a Houbung jousen amama Houbung a bol talou a Houbung tin akon mi 73 tobang in munkhat a thakhat a abolkhom u ahi.

December 6 : KBC Gambih No. 1 Men Department Assembly chu Centre Church, Canaan Veng Imphal munah lolhing tah in ana ki-chaitai.

December 6 : Tunin Centre Church Salem Sapormeina a Nungah Gollhang mi 35 in Tahsan kitepna Baptisms channa Rev. Ngulkhopao Haokip khutna ana neitauve. 6/12

December 6 : KBC Centre church Tujangvaichong KBC No.6 in SUNDAY SCHOOL DAY Loupi tah in anamang tauve. Hiche kin a hin Gl. Thangkhochoh Haokip MPS, Addl.SP Kpi chu Jing-Gun in apangin, Pu. Lhunkhohen Kipgen Tujangvaichong Haosapu chu Kin- neipa in apangin ahi. Hiche kin a hin kumsung Themvetna a lolhing ho leh Sunday school kai ho chuleh Tehse pontho ho thilpeh hoi tah tah akipen,

Sunday lang akon in ajildoh ho u Bible chang simna, Lam kitet na, adang dang jong akibol in ahi. Church Pastor in Sunday school tukum adin khumkha naleh kipa Thuseina aneiyn akichai tan ahi. Kakipah e. Pr. Henkhomang Tuboi Pastor KBC Centre church Tujangvaichong KBC No.6

December 7 : Vangset umtah in Molphei Vangkho a um Pi Veikhoneng Haokip(92 yrs) w/o Pu(L) Chongkholet Haokip chu tahsa dammo akon in damdoh jou talou in aleiset hinkho ana mollem tai. Pi Veikhoneng Haokip hi Pu Nehlet Haokip, Molphei Head Deacon pa penna nu ahi. Adalah insungmi, khomi leh Houbung mite Pathen in lungmonna petao hen.

December 8 : Moreh Baptist Church Women Department, KBC No.15 in LRC vilna ahung neijun noiya hohi thilpha abol houchu noi-jah kahin vetsah e: Lydia Resource Centre kithopi nadin Dk.5000/- ponkhong Ng. hodin nihchen ponsil phabep jong Christmas gift in envelope khatcheh apeuvn kipana alenlneh e. Chung Pathen in thilpha bolna lama chimtih neilouva hungpang minute jouse hamjang bohjing taken.

December 9 : Baptist Church T, Champhai KBC no 8 in Kum phabepi sunga sumlepai thalejung neilegou tampi luta Pathen Hou-na mun ding mithi pumle ulsa puma nanaboipi uva Tunia kot hon theidia aumtahjihin T. champhai Houbung Pachatna sangtahle Kaki-papina sangoen kahinpen ahi Building committee , Deacon board, Chule Khotol Housapu nabon chaova napan lahdanu ka jan kamun nangho jalin Kakithang at lneh jengin ahi. Houbung miten eima inn sang a Pathen Houinn athuipi penna agelu akimun Loupina Pathenna ahi. Gambih Chairman

December 9 : Pastor Paugoumang @ Benjamin Chongloi leh Ng. Dr Nemneineng Haokip Houdan thenga Kichena (Holy Matrimony) Rev. Thongkhongam Haokip kinthempu hina in KBC Centre Church Langol muhah lolhing tah in ana kichaitai. Pathen in insung nom hipe jing lhon hen.

December 10 : Khaopijang Baptist Church KBC No. 8 a Gl. Seilal Baite le Ng. Kimneilhing Lupho Houdan Thenga kichenna aneinalhon tan ahi. Pathen in insung nom hipe jing lhon hen.

December 10 : Vangset umtah in Dongsum ma um Pu Shonngam Haokip chun Innsung mite, khongsung mi Lhangsung mi ngaicheng dalhan pa komma choldo ding ana chimasa taii. Adalhah a innsung mite pathen n lhamon na pijing tao hen.

December 17 : Vangset umtah in Kholen acheng pa Ngulminthang kipgen inn chu Electric circuit akon a inn pumpi aka lha in Pathen lungset najal in innsung mite ajam doh man uve. KBC no. 5 ako ahi.

December 17 : Kholen Baptist Church KBC No. 5 Houbung sunga tu masang jep a In meikah te chu KBC minin Relief thil peh doh na Gambih Pastor Thangminlal Haokip toh akineitan ahi.

December 20 : Hill Town a um Ng Nemneilhing gollhah na kin le vangthumpeh na Rev Mangpithang in ana nei tai. Pathen in ajineina munah lolhinna hinpe jing taken.

December 20 : Sajal houbung KBC 7.a konin pasal 5 le numei 2 in Pastor Letkhoson Haokip, Gambih Pastor khut ah tahsan twilutna ana neitauvin ahi.

December 20 : Tunin Haolenphai ah Tahsan tuilut chate mi 4 ana kibol in ahi.

December 20 : Maokot Baptist Church KBC Gambih No 6 muna Pu Paothang Haokip, haosapu le a insung miten Pathen ngailutna jal a Pakai lhacha ho Jinlhun Inn (Guest House) ahin sahdo u chu, Pastor Letminlal Khongsai, Pastor KBC Gambih No 6 in Pa Pathen, Chapa Pa-then chuleh Lhagao Theng Pathen min in kot hondohna le thenso na ananei tan ahi. Pathen thangvah in umjing taken.

December 20 : Maokot Baptist Church muna Nungah ni toh Gollhang khat in Pakai Lhacha Pastor Letminlal Khongsai, Pastor KBC Gambih No 6 khut a tahsan tuilutna ana nei uvin ahi.

December 16-17 : KBC gambih No.16 Annual assembly cum Election lolhing tah in ana kichaitai.

December 27 : Pu Lalminlun Neihsial S/o Upa Henlam, Neihsial Veng (Haosa chief) chu, damlohna khenkhat ziakin tuni 27th Dec.2020, ni-taklam pung 3:00 pm tuam vël in ît leh ngaih cheng taihsan in eila mualliam san tai. Lalpan, ataihsan Insung mite,a zi acha te thamuan na pia ta hen aw.

KUKI CHRISTIAN-HO LAH'A AMASAHO

01. Pu Ngulhao Thomsong chu Anal, Moyon, Monsang ho lah a Kipana Thupha (Gospel) polut masapen ahi.
02. March 5-8, 1959 nikho in NEKBAM khoppi masapen Khomun-nom Houbung a ana kibol e.
03. Pu Rev. Seikholet Singson chun 1957-1960 sung MBC a Executive Secretary masapen anapon ahi.
04. 1968 Kum in Imphal Christian Centre Church mun a Kuki Worship Service anakibol pan in ahi.
05. 1958 kum KBA le NEKBAM akigop a "Kuki Baptist Convention" kiphudoh a lamkai masapenho chu: President, Pu Sutkai Chongloi, Vice President, Pu Dongkhothang Sinson, Executive Secretary, Pu Tongkhojang Lunkim'Treasurer, Pu Mangkho Thomsong, Clerk, Pu Paokhosem Kholhou, Chowkidar, Pu Tongkhojam Baite.
06. March 16, 1958 kum in KBC Constitution Drafting Committee masapen ana kilheng in, October 22-24, 1958 in Imphal Christian Centre Church mun a Assembly in phatsahna ana nei in 1959 kum in ana kichepi pan in hiche Constitution hi KBC in achepi danpi masapen ahitai.
07. 1959 kum in Keithelmanbi houbung a KBC Fellowship masapen a ana kibol e.
08. KBC Kiphudoh jouva department chom chom'a dinga anakilhengdoh Director masapen ho chu: 1. Women Director- Pu Paokhosem Kholhou, 2. Youth Director -Pu Ngamkhoneh Kipgen, 3. Economic Director - Pu Lhuntong Touthang, 4. Stewardship Director, Pu Lalkhosei Kipgen, 5. Evangelist Director - Pu Solomon Vaiphei, 6. Education Director- Pu Dongkhothang Singson, 7. Medical Director - Pu Sonkhothang Kilong ahiuve.

LHAGAO HINKHO PUIHING THEIHO

01. Mitthah khun alha akimu pon chule ahoina jong akihet poi, ahinlah midang invang alha le ahoina jouse amu thei uve akitin ahi. Eiho jong chutobang chu ina hinom jiuvin ahi.
02. Ipi phung le chang, numei le pasal, hoi le hoilou in imacha apopoi, mihem jouse sunga lolhinna aum cheh in ahi.
03. Leisetna hin mi khat hinkho man dan le hinaho kilah thei le chomkhat kah a mang cha thei ihipouvin, eima eima hatna le hinna abou lam ikijot cheh ding'u ahi.
04. Mol chung kal le kal lou hi eima thu thu ahi, ahinlah mol chung akon a hung kum lhah ding hi nop le nop lou thu hilouva kibol ahi.
05. Na hatna, na bol theina chule na lhahsamnaho na kihetdoh masat pen angai in, hiche jou teng chuleh hiche dungjuiya chu hinkho na kipui ding ahi.
06. Mi tamtah in midang hinkho hindan alah nom jeh uvin alolhing jou jipouvin ahi.
07. Eima hina a hinkho man ding kitihi eima kigelna le lunglutnapa chu ahin, hichu thil ijakai aphotna lampi dinga pan lahna chu ahi.
08. Midang lunglutna le thanopna hilouva eima lunglutna le thanopna chepi hin lam eilhunsah jou dinga ahi.
09. Nangma hin dan mong monga na hindoh tengleh na kipa ding chule na deina lampi na kimanchah thei ding ahi.
10. Eima hina a hinkho man ding kitihi midang lunggel jong lah thei, mi thumop jong kilah ding amavang eima tup le doina mun lhunna dinga hin ding tina ahi.

LUNGHEMPINA



PASTOR LIMMINTHANG ZOU

No 1 . Pastor. Limminthang Zou S/O Chongthang Zou, Molnoi Village, 2nd March 1975 kum in anapengin, Date 30th. Sept. 1990 kumin Pastor Letsei Touthang khutna Baptized anabollin ahi Date 16th May 2002 nikhon Pastor ST.Onmang khut'a Ms Lamneikim D/O Hempao Mate Chanu toh Hou-Dan thengin kichenna' ana neilhonin ahi.

No 2. 2000 March in B. Th. ahin chaijin abanin April, 2002 kumin Trulock Theological Seminary (TTS) a M.Div. ahin chai in ahi. 1st. Nov. 2014 kumin KBC Worker khat a din Appoitment ana kipein ahi.

No 3. Gelpah louvin tahsa damlouna ahin neijeh in ahina bangtah in akalsong joutapon ahileh KBC kivaipohna Dan dung jui in Medical Leave with pay six months Date 1/7/2019 to 31/12/2019 anakipein, Medical Leave with half pay six months Dt. 1/1/2020 to 30/6/2020 vangset umtah in tahsa tahsa ahatdoh jou tahlou jeh in 1st. July 2020 nikhon KBC Office mun Medical Pension dingin Ihahna anakinei tanahi.

No.4 Pastor Limminthang hin KBC sunga Pathen Lenggam na ahintoh sung Kum 6 (sixYrs) kitah tah le pontho tah'in na ahintongin atoh khompi Rev., Pastors, KBC worker jousen kahom thouvin ka-it Cheh un ahi.

Vangset umtah in december 21, 2020 nikho in akalnatna akon damdoh jou talou in tahsa hinkho mollemna ana neitai

9th Dec. 2020 Nikhoa KBC Gb. 8
a um T. Champhai Houin thah
sahchaija aumtoh
kilhon in Kot honna
ana um in ahi.



Chapang Kailensang
kijenna ding in
kithopina a KBC in
Rs. 10.000 ana pehna



9th Dec. 2020 : Pastor Paogoumang Chongloi le
Ng Dr. Nemneineng Haokip Dantheng a kichenna ananei ta.

Post Regd. MNP/81
Regd No. 18134/88

Rev. Dr. M. Thongkhosei Haokip, General Secretary

**January 2021 (Thursday)
Gammomphai Local Church**



**Achesa Nisim 7 January 2021 Nikhoa K. Gammomphai Houbung
KBC a ding a General Secretary
Pu Rev. Dr. M Thongkhosei Haokip in Lahlut na ana neina.**



**Changlei Baptist Church KBC a dinga Houbung lahlut-
na Rev. Dr. Paotinthang Chongloi, Pastor in lahlutna
ana neitai.**

If undelivered, please return to

The Editor. KBC Thuso

KUKI BAPTIST CONVENTION

Opp. DM College, Imphal - 795 001

Contact: 9862633173